

A D
EMINENTISS. ET REVERENDISS. DOMINUM
S. R. E. C A R D I N A L E M
SIGISMUNDUM DE KOLLONITZ
ARCHIEPISCOPUM VIENNENSEM
E P I S T O L A.

1870

1871

1872

(III.)
EMINENTISS. ET REVERENDISS. DOMINO
S. R. E. CARDINALI
SIGISMUNDO DE KOLLONITZ
ARCHIEPISCOPO VIENNENSI

A. M. CARD. QUIRINUS
S. R. E. Bibliotbecarius, & Episc. Brixien.



Uamvis in plerisque omnibus literis Tuis, Cardinalis præstantissime, quibus benignissime in more habes certioreme facere, gratas Tibi accidere tenues lubricationes meas ad oppugnandos Heterodoxorum errores compositas, apertissima mihi sese offerant argumenta studii prorsus singularis, quo ad exoptandum adduceris, ut istæ fructum illum referant; cujus causa evulgantur, haud ullæ tamen ex iisdem literis adeo luculenter me de egregio eo animo Tuo edocuerunt, ac postremæ, quas dedisti die decimo octavo mensis Januarii proxime elapsi. Pereas scilicet benevole a Te exceptam fuisse significans itineris mei Bavarici recens Tibi transmissam descriptionem, palam una simul comprobasti, unum ferme fuisse quod Te in ejusdem lectione afficeret, nempe conatus, quos perspexisti assiduo, enixoque studio a me impendi, ut Catholicorum dogmatum lumen in eorundem Heterodoxorum mentibus exoriatur. Putassem ego, delectare Te in meo illo Commentario aliquantulum posse, Italum Cardinalem contemplari, qui, etsi haud mediocriter ætate progressus, tantum erga Germaniam Tuam, Diocæsis suæ sinibus conterminam, amorem præferat, ut autumnalis vacationis tempus non quidem in revisenda chara Patria, seu Romana urbe, quæ pari-

(IV.)

ter loco Patriæ ipsi esse debet, neque in amoena aliqua rusticatione fruenda, infumere decreverit, sed in ejusdem tantum Germaniæ Academiis, Bibliothecis, atque Cœnobiiis lustrandis, idque equo vectus, quod viæ procul a regia ad ea Cœnobia deferentes vehiculigenus aliud vix, aut ne vix quidem patiantur. Tu tamen nulla propemodum ratione habita ejus laudis, quam ex meis hisce peregrinationibus redundare quis censeret in regiones haud levi certe cum incommodo a me perquiritas, unice in legendo illud Itinerario menrem advertisti ad Catholicæ Religionis utilitates, quibus domi, forisque curandis qualemcumque meam jamdiu desudare industriad, ex eodem innotescit. Quod scopus igitur iste propagandæ Fidei Catholicæ, Christianique ovilis amplificandi mihi proposuit studium Tuum, dum Commentarium illum evolveres, ita excitaverit, ut reliqua in eodem narrata incogitantia veluti quadam transfergeris, hoc mihi certissimam fidem facit, sacri pectoris Tui curas maxime sibi vindicare quidquid ad eundem scopum quoquo modo conferre posse arbitreris.

Sanctissimos istos mentis Tux sensus postquam compertos mihi reddiderunt Tux præsertim literæ nuperrime ad me datæ, vix credas, quam valide extimulari persenserim animum meum ad provinciam, quam ante susceperam, magis, magisque procurandam, ac præsertim ad nova investiganda documenta, unde evidentius constaret, injustam omnino fuisse Lutheri, aliorumque Sectariorum ab Ecclesiæ Romanæ consortio secessionem. Nosti jam, quodnam ad impetendam eandem secessionem armamentarii genus mihi paraverim ex Editione, cui incumbo, Reginaldi Poli Cardinalis Epistolarum, aliorumque ad ipsum, & quomodo meridiana luce clarius ostenderim ex commercio epistolico, quo idem Cardinalis, ejusque Collegæ secum invicem familiariter admodum conferebant de gravissimis Religionis negotiis suæ curæ a Paulo III. commissis, negotia ista ab iisdem Proceribus adeo sancte, & sapienter administrata fuisse, in primis vero quæ ad Ecclesiasticæ Disciplinæ reformationem, in Curia Romana maxime sta-

statuendam, spectarent, ut quotquot sincere Christianæ Reip. bonum expeterent, non alia ratione voluntatem hanc commonstrare potuissent, quam illorum Procerum vestigia persequendo. Nova, quæ, ut dixi, perlectis illis literis Tuis investigare cœpi documenta, accipe, quo pacto Deus effecerit, ut cito mihi occurrerent. Ex imposita mihi persona a SS. D. N. (rem jam intellexisti) Cardinalis Augustini Valerii, perlegi primum Historiam ab hoc conscriptam Anni Sancti Clemente VIII. Pontifice celebrati, deinde vero alias ejusdem sanctissimi, & doctissimi Viri lucubrationes, quotquot in publicam lucem promanasse comperiuntur. Eandem nondum vidisse detexi, & vehementer dolui Opusculum adolescenti Polono inscriptum, hocque titulo exornatum, *Quatenus cum iis, qui a Sanctæ Mariæ Ecclesiæ gremio recesserunt, sit versandum*. Hocque ipsum est, quod Deus fecit, ut cito mihi occurreret; siquidem illud liberaliter mihi obtulit Petrus Antonius Albertinus, Provinciarum generalis Veronæ, Vir non rerum tantum Episcopalis Curix, sed aliarum etiam doctrinarum peritia insignis. Avide igitur, amantissimeque idem amplexatus, imo deosculatus, statim dignovi, jure ac merito ipsum probatum fuisse Roberto Cardinali Bellarmino, cui legendum Romæ Author præbuerat, etsi hic nimis modeste nunquam adduci potuisset ad illud diligendum. Factum istud utrumque testatur ipse in libello, quo Scriptiones suas recensuit, moxque ibidem subdit, *Ita fit, quemadmodum deteriores filios interdum parentes diligunt magis, quam bonos, ita minus bonos libros pluris faciamus, quam elegantes, & magis utiles: ita decipimur sæpe, præsertim in rebus nostris*. Decepit (si ita mihi loqui fas est) Valerium ejus modestia, nec aliter absque dubio judicabis, Domine Eminentissime, quum Opus istud perlegeris, dignissimum utique, sive elegantiam, sive bonitatem, sive utilitatem spectemus, suo parente, atque insuper Episcopi gradu, quem jam iste obtinebat, dum ipsum S. Pio V. Pontifice conscripsit, & gradu etiam Cardinalis, ad quem paulo post eundem Gregorius XIII. evexit. Dixi, utroque eo gradu dignissimum a me censei Opus illud, quod ip-

femet Valerius pluribus locis affirmet, Episcoporum, & Cardinalium munus maxime esse, Scriptiones ad tuendam Catholicam veritatem evulgare. Quod attinet ad Episcopos, mentem suam aperit initio ipsius Commentarii, de quo agitur; nam Poloniu adolescentem his verbis affatur, *Ideo scribo, quia praeclaram tuam, & vere nobilem, & Christiano dignam voluntatem erga communem Matrem Sanctam Ecclesiam, & studium, quo excellis, purgandi gregis Christi, ista tua adolescentia non modo vehementer probandum, sed omnibus rationibus alendum esse existimo a nobis praesertim, quos in sortem suam Deus elegit, quos sponsa sua charissima D.N. Jesus Christus custodes in Ecclesiastica Hierarchia constituit. Et infra, Multo magis (Jurisprudentiam, Medicinam, & Mercaturam nominaverat) sine dubio probanda sunt ea studia, quae magis ad juvandam Christianam Remp. & gloriam Dei pertinent: inter quae nullum magis Deo placet, nullum magis cum ejus gloria est conjunctum, & cum populi Christiani utilitate, quam id quod ponitur in extirpandis haesibus. Subdit tandem, studium hoc proprium esse Episcoporum, & quandoquidem fatis ipsi esse non possint tanto muneri implendo, Tunc donet (inquit) necesse est Dominus spiritum scientiae fidelibus servis suis, ut causam communem defendant, agris mentibus, & labe infectis animis opem ferant. Quod vero spectat ad Cardinales, in eo libello, quo Cardinalis ideam Valerius expressit, quemque S. Carolo Borromæo nuncupavit, ita legitur, Quod si, ut nonnulli ex sacro illo Collegio fecerant, & adhuc sunt, qui magna cum laude id possunt facere, libros scribat populo Dei utiles, quibus haereses confutentur, amplissimo loco, quem in Ecclesia Dei tenet, splendorem addit non minimum, & in hoc maxime Romani Pontificis frater, qui tanto studio ejus auctoritatem tuetur, & Sancta Ecclesia optimus filius, qui ejus limites fortiter defendit, agnoscitur. Est praeterea custos depositi, & Apostolicarum Traditionum, ab omni novitate, utpote omnium seditionum, & variarum calamitatum altrice in populo Dei, alienissimus.*

Annon ergo, Cardinalis optime, gemma me positum existimem, propterea quod eum Valerii Commentarium posside-

(VII.)

sideam / Gemmam dixi, quod tanti parentis sit foetus, quod argumentum in eo pertractetur, cui studia mea devovi, quod denique implendis Episcopi, & Cardinalis partibus, quas præsertim sitas esse Valerius, ut audisti, pronunciavit in scribendis libris, unde hæreses confutentur, multo aptiorem me efficient lucubrationes, ex alieno, quam ex proprio mei ipsius penu depromptæ. Novum autem gemmæ isti pretium accedat, oportet, si cælaturum in eadem compareat præclarissimum nomen Tuum. Is quippe es, qui Romanæ Purpuræ, & Episcopaliū Infularum splendorem maximis virtutibus augeas, zelo in primis Christianum ovile amplificandi, quem superius collaudavi, quoque præcordia Tua vere inflammari vel unum votum hisce verbis in Epistolæ Tuæ calce declaratum abunde demonstrat, *Piaccia alla divina alta sapienza ch' illumina il nostro Santo Sommo Pontefice, suo Vicario, che ciò succeda* (loqueris de Sectariorum ad Romanam Ecclesiam adjunctione) *sotto il suo Apostolato.* Sic equidem animo & ipse duco, futurumque reor, dum recole eventus secundos, quos ferunt aspera certamina, quibus Heterodoxos omnium fere Germaniæ partium laceffo. Ea acerbitas haudquaquam officit, quominus singularis prorsus humanitatis officiis nomen meum jugiter honestare iidem haud dedignentur. Nec defuerunt inter ipsos, qui disertis verbis professi sint, Ad sapientiam Cardinalium Poli, Contareni, Sadoleti, aliorumque integerrimorum Virorum, quos vocatos, rogatos Paulus III. in amplissimum Ordinem adscivit, nil aliud fuisse Lutherum, quam Thracium hominem, cuiusmodi A. Gellius describit, ruris colendi insolentem, quippe qui, ut ager mundus, purusque fieret, ejusque arbor, & vitis sæcundior, tantam ligni, frondiumque cædem fecit, ut frugifera quævis everterit, *mala mercede* (in hunc modum narrationem suam claudit Gellius Noct. Atticar. l. XIX. c. XII.) *doctus audaciam, fiduciamque peccandi falsa imitatione eruditus.* Haud patiter defuit inter eisdem, qui de meis adversus Schelhornium, & Kieslingium disputationibus iudicium hoc ferret, *Quam docte, & acute Burnetii, & aliorum, qui partium studio abrepti de san-*

(VIII.)

ti viri (Cardinalis Poli) memoria detrudere ausi sunt, commenta, & calumnias profligasti! ut qui eas in posterum repetere velit, se omnium ludibrio exposturus sit... Quanta gravitate, quam invictis argumentis Kieslingium, Pauli III. Pontificis maximi in sacris emendandis studium non modo perstringentem, sed, quod deterius est, negantem, refellis!

At judicia hæc privatorum hominum, etsi insigni doctrinæ fama inter suos floreat, nimis quantum exsuperat Goettingensis Academiæ Senatus-Consultum, quo ipsa statuit Episcopatus mei Brixienfis Vicennalia celebrare, typisque excuso libello, cujus centena exemplaria dono mihi transmittere dignata est, universæ literariæ Reip. suam illam erga me benevolentiam pernoscentiam dedit. Quod autem magis mirandum, eidem libello inferere non refugit Epistolam per aliquot menses ante Senatus-Consultum illud ad Fe-verlinum Goettingensem Professore a me datam, quamvis in ipsa complexus fuisset maximi momenti rationes ad Catholicam causam juvandam. Insuper, ad libelli illius calcem excusa videntur in mei memoriam Numismata duo, illustranturque pluribus Adnotationibus a Coelero in eadem Academia Historiæ Professore. Rarum hoc comitatus hominum illorum monumentum, cui forte non aliud simile in Ecclesiasticis Annalibusprehendatur, adeo non sunt averfatæ reliquæ Heterodoxorum Universitates, ut plausu potius illud exceperint, quemadmodum fidem faciunt publica folia, ex quibus nuperrime meas ad manus pervenit Tiguri impresum die 29. Jan. 1749., & egregia Pauli III. gesta ita collaudans, perinde ac si injuria a Protestantibus ea carpi consueverint. De Goettingensi Academia hoc etiam addam, pro augenda, seu firmius stabilienda Apostolici in iis partibus Missionarii mercede ut deprecatores me sisterem Romanæ Congregationi de Fide propaganda, seu ipsi Summo Pontifici, preces suas ad me interposuisse, quemadmodum fecerat idem Missionarius, atque una cum ipso complures Goettingenses incolæ, orthodoxæ Religionis addicti, ita & ex publicis Professoribus unum. Hæc res effecit, ut quum nunciatum mihi nuperrime

me

(IX.)

me fuisset a Domino Cardinali de Alsazia , centena' , & centena' bonorum Hanoveranorum in Belgio militantium subinde hæresi ejurata ad Catholicam Fidem profitendam se contulisse , eidem Cardinali , quem studio ejusdem Fidei promovendæ nemini , æque ac Te , secundum , quotquot ad me literas scribit patefaciunt , responderim , Deo favente modum non defuturum , ut pares eorundem transitus non centeni tantum , sed milleni in posterum contingerent . Demum Templum Catholicis hominibus in Urbe Berolinensi ex Regia Principis illius indulgentia hac tempestate erectum , meliora valde quam antea fata Catholicæ Religioni in illis partibus portendere quum intelligam , laud renuo quidem magnificæ illius Ædis curam pro viribus meis capere , quam nimirum testantur literæ ad Berolinensem Academiam ante decem circiter menses a me datæ , at una simul inculcare non desino , multo magis cordi mihi esse , *ut quod corporalibus proficit spatiis , spiritualibus amplifecetur augmentis* , coagmentatione scilicet vivorum lapidum ad Ecclesiam Christi sponfam . Id ipsum iteravi in nuperrimis literis ad ejusdem Academiæ Secretarium , quibus demonstrare suscepi , per summam calumniam a Luthero in quampluribus Scriptionibus suis reprehensos fuisse Catholicos de Sacræ Scripturæ contemptu , attulique ad eam rem indubia documenta assidui , enixique studii , quo divinum illum Codicem , comparata etiam Orientalium linguarum peritia , versare in more habuerunt , vel eo tempore , quo gravibus Legationum ultra montes curis distinebantur , Romani Procures superius nominati .

Hisce omnibus superesset adhuc quod adderem , nisi factis omnino certis , quæ hucusque in medium adduxi , quidpiam dubitationi obnoxium subungere vererer . Addam tamen . Scripsit ad me celebris Professor Heterodoxæ Universalitatis ab uno circiter mense Epistolam , cui hoc fecit exordium , *Acciderunt mihi his ipsis diebus , quibus gratiosissima Tuae , Eminentissime Princeps , reddita sunt litera die XII. Decemb. data , fata longe tristissima , & saluti meæ oppido minacia ; nec possum quin Virgiliis utar strophæ ,*

Nox

*Nox vixit, Æneas, nos flendo ducimus horas,
Hic locus est, partes ubi se via findis in ambas.*

Ex literæ a capite ad calcem scatent querimoniis, quin tamen earundem scriptor mœroris, quo premitur, causas distincte declararet, solumque apertis verbis fatetur, pertæsum se esse vitæ Academicæ, commodamque expectare publici muneris mutationem. Literis hisce acceptis placuit mihi vaticinari, per bivium, cui designando adhibita fuit Virgiliana strophæ, intelliigi forte scribentis animum, anxium veræ Religionis dignoscendæ; ac proinde confidenter reposui, viæ hujusmodi duces omnino fidos meas eidem jamdiu commonstrasse lucubrationes, hos ergo sequeretur, longius pedem referens ab anfractibus, quibus certo certius in abruptum barathrum deferatur. Ridebit iste, ut puto, quum responsi tradendi tempus advenerit, meam illam interpretationem, non ideo tamen nre pœnitebit credulitatis meæ ex amore erga hominis illius æternam salutem profectæ.

Dum latis hisce, quas hucusque exposui, cogitationibus animum pascere, quod mihi omnino videretur ad subsequuturam nostra hac tempestate Ecclesiæ pacem proludere *altitudo divitiarum sapientiæ, & scientiæ Dei*, extra modum lætatus sum Tua illa Epistola accepta, qua in certioris adhuc omnis argumentum, Apostolatus BENEDICTI XIV. mentionem injecisti. Ego quoque quam ingentem spem in eo ipso Apostolatu pro obtinendo cœlitus emolumento, de quo agitur, posuerim, affatim comprobant bina Bavarici mei Itinerarii SANCÆ. SUE. inscripti loca. Namque p. VI. disertis verbis sum ominatus: Fore, ut Pontifici, admodum sollicito de augendo Cœlitum canone viæ a divina Providentia pandantur æque utilem præstandi sollicitudinem ad amplificandum Christi fidelium gregem, unde major cultus eidem Christo, ejusque Sanctis tribuatur; & p. XL. in eum ipsum ferme sensum Pontificem ita compellavi: Fore, ut ex supremi sui Apostolatus cura Christi Ovile dilatetur, cœlique sedilia uberiori civium conventu frequententur, pari ratione ac civium ea sedilia complentium nomenclatura sapientissimis Ejus consiliis, multo frequentius quam unquam antea, post
innu-

(XI.)

innumeras inquisitiones , quas negotii natura deposcit , propalatur. Magna affinitas inter ambas istas sollicitudines cur non faciat , ut SANCTITAS SUA de utraque æque gloriatur? Primæ illius sollicitudinis partes quam egregie semper impleverit , luculentissime testatur SANCTITATIS SUE Epistola Cardinalibus Sacrorum Rituum Congregationi Præpositis, ejusdemque Congregationis Consultoribus inscripta, ac præmissa quarto Volumini Operis de Beatificatione , & Canonizatione Edition. Bonon. rursusque Volumini primo Edit. Patav. In ea enim Epistola ita legitur, *Neque porro aut multiplicia Romana Curia negotia , quæ nos primis a suscepto Promotoris (Fidei) & Consultoris (SS. Rituum) officio temporibus non mediocriter exercebant , aut nova , quibus deinceps liberaliter aucti sumus , eaque gravissima munera a Secretis Concilii , Consultoris S. Officii , Doctoris Sacrorum Canonum in Foro Penitentiariæ , & alia quamplurima , in quibus sive considerandis , sive gerendis nostra assidue opera Summi Pontifices utebantur , nos aliquando tenuerunt , quominus , & (quod Promotoris esset) accurate scribendo , & (quod Consultoris) ad singulos Sacrorum Rituum Conventus sedulo accedendo , utrinque officii partes impleverimus. Pari , quin majori (nam res id prorsus exigit) sedulitate , atque assiduitate videre jam mihi videor BENEDICTUM XIV. incumbentem , ut omen , quod dixi , impleatur . Crederes? His ipsis diebus quibus hæc scribo , Hominis heterodoxi , cui jam innoteuerant & mea illa fiducia , & sanctissimus ejusdem Summi Pontificis animus , atque imminens Anni Sancti Solemnitas , literæ ad me pervenerunt , in quibus post plura de mea Epistola ad SANCTITATEM SUAM data die VII. Januar. hæc ille habet , *Vous n'oubliez pas , Monseigneur , de dire au moins , qu'il y a toute esperance , que les heterodoxes se convertiront jusqu'au Jubilé prochain la plus part d'entre eux , au moins les plus clairvoyans , reconnoissant déjà le tort qu'ont eu Luther , Calvin &c. de se separer de l'Eglise Universelle , & de causer de si grands scandales , & reconnoissant aussi l'avantage qu'a la Communion Romaine , d'avoir au Timon de l'Eglise le Pape Regnant , si sçavant , & si zélé . Sanctitati , &c.**

(XII.)

doctrinæ BENEDICTI XIV. uberestribui laudes ab ipsis Heterodoxis, compluribus documentis edocemur; et si unum sufficeret Judicium Operis de Beatific. & Canoniz. ex Actis Eruditor. quæ Lipsiæ vulgantur, petitem, quod, licet sexdecim magnas, & quidem minuti characteris impleat paginas, consulto Editionis Patavinæ Volumini I. præfixum visitur.

Tali igitur, tantaque etiam apud Heterodoxos existimatione florentem supremum Catholicæ Ecclesiæ Hierarcham selegisse sibi Vicarium Christus censendus est hac tempestate, quo ejus Apostolatus decus foret redintegrata Christianarum omnium Ecclesiarum concordia. Sacri belli, per quod ista ante ducentos circiter annos discissa fuit, maximum se actorem præbuit Saxonix Princeps; modo vero Saxonix imperat, qui Orthodoxam fidem profitetur. Palatinatus totus olim hæresi infectus, in præsens subest Catholico Domino, & maxima ex parte a Catholicis incolitur. Prussix denique Monarcha, quem admiranda plurimarum rerum, & artium intelligentia pollere fama undique concelebrat, quam valde nunc faveat Catholicorum commodis, nemo est qui ignoret. Annon ergo dicenda est divina Sapiencia BENEDICTO XIV. viam sternere, de qua loquor? Itaque hoc quoque loco fas mihi sit innovare eas ipsas preces, quas in Præfatione ad Bavaricum meum Itinerarium SANCTITATI SUÆ obtuli: Ut scilicet conatus pro modulo meo impensos ad demulcendos, devinciendosque A catholicorum animos, Ipsa perficiat, confirmet, solidetque, consiliis, cōhortationibus, amplissimis a Deo propositis præmiis Reges terræ paterna autoritate adducendo, ut sibi præclarissimum Opus istud persequenti obsecundare non recusent. O fortunatum BENEDICTI XIV. Apostolatium, si tanti boni ex voto Tuo, Eminentissime Præsul, compos tandem evadat! O me ter, & amplius felicem, si ejusdem voti postrema quoque pars ista impleatur: *E succedendo, chi non vedrà quanto con le sue lunghe, e virtuose fatiche vi avrà Ella infinito, e cooperato?* At quam leves, quam viles labores isti, quum ruber pileus, quem gestamus, sanguinis alacriter effundendi necessitatem nobis imponat!

Apprecor demum Eminentix Tux prospera omnia.

Brixia die XII. Februarii MDCCIL.

AU-

(1)
AUGUSTINI CARDIN. VALERII
EPISCOPI VERONENSIS

Ad Nicolaum Tomiscum Polonum

*Quatenus cum iis , qui a Sanctæ Matris Ecclesiæ
gremio recesserunt , sit versandum ,*

LIBELLUS.

IN magnis occupationibus meis scribo ad te, Nicolae, qua ratione, & quatenus tibi versandum sit cum illis, qui a S. Matris Ecclesiæ gremio videntur recessisse, quandoquidem in Patria tua, in isto Poloniæ Regno, ut audio, ita permitte Deo, permittitur Catholicis permixte cum non idem sentientibus vivere; & ideo scribo, quia præclaram tuam, & vere nobili, & christiano dignam voluntatem erga communem Matrem Sanctam Ecclesiam, & studium quo excellis purgandi gregis Christi ista tua adolescentia non modo vehementer probandum, sed omnibus rationibus alendum esse existimo, a nobis præsertim, quos in sortem suam Deus elegit, quos Sponsæ suæ charissimæ D. N. Jesus Christus custodes in Ecclesiastica hierarchia constituit; atque hoc quidem eo libentius facio, quum hac de re scribens ad te, amoris erga te meo, & veteri benevolentiae erga Nationem Polonam, cujus usque a primis annis, dum Patavii studiis operam darem, fui amantissimus, videor indulgere. Obsequor etiam Antonii Mariæ Gratiani, qui te mirifice diligit, & sæpe ad hoc est adhortatus, voluntati. Sed unde hunc libellum

A

exor-

exordiar adhuc sum dubius. Te laudem, quod adolescens, periclitantibus multis natu majoribus, e variis perversarum opinionum fluctibus te in portum salutis receperis, & salutis tuæ, & amicorum consulueris? quanquam si recte consideremus, hæc laus jure Deo tribuenda videatur, sine cujus præcipuo auxilio ista ætate te ipse e tam procelloso mari eripere non potuisses; nonnihil tamen etiam ad te potest pertinere, quippe qui Deum audieris, Spiritui Sancto, qui in Ecclesia semper præsto est, non restiteris, Soli cœlesti radios suos emittenti mentis, & cordis fenestram aperueris. At rectius a gratulatione, ut ego quidem arbitror, est exor- diendum, cum ob humanam infirmitatem in hac vita quispiam nec alios laudare, nec ipse laudari sine periculo possit. Laudetur igitur bonorum omnium æternus Auctor, & cœli, & terræ Dominus, qui mirabilia semper facit, & te tanta virtute ornavit, ut proximis mensibus Patavii amicum tuum pravis opinionibus imbutum ad Fidei sinceritatem rationibus multis revocaveris; qui tibi hunc spiritum dedit, ut sæpissime dicas, nullum alium finem tuorum studiorum, ac laborum tibi esse propositum, nisi ut amicos, affines, & parentes tuos ad Sanctæ Matris Ecclesiæ gremium possis adducere. Divitiis, honoribus, humanarumque rerum doctrina non est sane cur quispiam debeat merito gaudere, cum usu ita comparatum sit, ut illis bonis plerumque abutamur. Divitiæ contu-
me-

melix & incontinentix, honores invidix & de-
 tractionis, scientix curiositatis & superbiæ occasio-
 nes sunt quamplurimis illis abutentibus. Hoc so-
 lum gaudendum est, quod filii Dei sumus adopti-
 vi, Fratres Christi, ejus sanguine a tyrannide Dia-
 boli liberati, quod ejus benignitate peccata nobis
 remittantur, quod ejus Sponsa Spiritu Sancto edo-
 cta, magistra nobis sit relicta, cujus præceptis
 si paruerimus errare minime possimus. Fides est,
 quæ nos filios Dei efficit: hanc charitate, quæ est
 reliquarum virtutum omnium veluti anima, for-
 matam sequuntur prudentia, justitia, modestia,
 patientia, & reliquæ christiano homine dignæ vir-
 tutes, quibus, & solis est gaudendum.

Quamobrem ego, qui te ob præclarum inge-
 nium, & morum probitatem vehementer amo, ti-
 bi vehementer gratulor. Mulierem stultam, &
 clamorantem, nihil omnino scientem, sedentem in
 foribus domus suæ, in excelsio urbis loco, de qua
 Salomon in Proverbiis, D. Hieronymus interpreta-
 tur Hæresim. Justa gratulatio, justissimum gau-
 dium, quod a blanditiis insanæ hujus meretricis
 aufugeris, quod divino auxilio adjutus ab ejus am-
 plexibus te ipse abstraxeris. Etenim cum nihil sit
 magis contrarium sapientiæ, a qua longe abesse
 non potest humilitas, quam hæresis, cujus mater
 & alitrix est superbia, stultæ & insanæ mulieris no-
 men illi maxime convenit, cum stultos efficiat
 amatores suos; quandoquidem suscipiunt iter sine

duce, ambulant in tenebris, relicta magistra veritatis, quam Spiritus Sanctus, solus optimarum scientiarum magister, docet semper; ancillam Diaboli, ambitione & avaritia ortam, luxuque ac variis jurgiis, & contumeliis auctam amplectuntur, amant, & mordicus defendunt; quos in sui amorem trahit insana illa mulier miserrimos jure appellamus, quandoquidem jam summo bono privati sunt, jam desinunt esse filii Dei, amissa, aut corrupta fide, servi, vel potius filii Diaboli efficiuntur; quidquid intelligunt plerumque ad perniciem suam intelligunt; quidquid moliuntur, quo majorem Dei iram in se concitant, gravioraque sibi supplicia parentur, infelices moliuntur; ut paucis dicam, instrumenta omnia, quæ a Deo tributa sunt hominibus ad cognoscenda, & prædicanda maxima & illustria ejus in genus humanum beneficia, mentem, voluntatem, memoriam, sensus, linguam convertunt sæpe infelicitè, & ad suam, & ad aliorum calamitatem. Clamosa & garrula mulier custodem adolescentis, quam docti homines dixerunt modestiam, corrumpit; qui enim ejus amore semel capitur, omni impudentiæ genere armatus nihil non audet dicere, aut facere; vana persuasionè deceptus Sophistarum more, inanem gloriam aucupans, impias opiniones defendit, nova ipse dogmata confingit, iram Dei, & bonorum virorum quotidie in se magis concitat; inimicus humilitatis, contentionum cupidus dissidia quærit;

rit; eo tempore sibi videtur vivere, quo aliquid garrit, & in Sanctam Matrem Ecclesiam, in Vicarium Christi Romanum Pontificem, in Episcopos, in omnes Ecclesiasticos ordines invehit.

Atque ut jure optimo a gratulatione, hujus libelli exordium sumptum esse demonstrarem, paucis reliqua verba explico, quæ a Sancto Hieronymo hæresi sunt mystice tributa. Illecebris plena a sanctissimo, & doctissimo viro hæresis appellatur. Consideremus quot illecebris irretiat animos. Hæ sunt illecebræ, inanis fiducia, qua decipiuntur quidam putantes fore, ut omnes qui crediderint in Christum salvi fiant sine ullis operibus; statim ubi quis dixerit, peccavi, sine ulla pœnitentia ipsi condonata esse peccata; stultam & supervacaneam esse confessionem peccatorum; majorem partem Sacramentorum esse inventum hominum; omnes ceremonias veluti inutilia onera negligentes; decimas non solvendas, patrimonium pauperum hæreditatem Christi bona Ecclesiastica dilapidanda. Quid hoc est aliud, quam blanda oratione in vulgi aures influere, animas decipere, tacite invitare ad peccata, ad luxum, ad avaritiam, ad omnem licentiam, omnemque impietatem? Quæ omnia portenta, & multo plura, sedentes in foribus domus suæ, in excelso Urbis loco, docere solitos infanz & stultæ, de qua loquimur, mulieris amatores, scribit idem, quem nominavimus, egregius Doctor Hieronymus: quibus verbis declarat, ut diximus, hæ-

hæresis matrem esse superbiam, omnesque hæreticos hoc inprimis spectare, ut contra præceptum Christi, Magistri appellentur, sacris tantum Scripturis, & expressio Dei verbo fidem adhibendam prædicent, traditiones Apostolorum non esse magnificiendas, sacrosancta Concilia, Pontificum decreta nullius esse momenti, ceremonias ab eisdem, Spiritu sancto edocente, institutas sedentes tanquam doctores nugas putent, usumque Imaginum aboleant, omnem Ecclesiasticum ordinem pervertant; & quasi ipsi soli sapiant, desipuerint omnes, qui ante tot secula fuerunt, desipiant etiam quamplurimi sancti, & docti homines qui vivunt, sibi credi postulant tanquam Evangelistis, quasi homo non fuerit Lutherus, homo Calvinus, homo Philippus, homines non fuerint omnes hæresiarchæ, quos ipsi sequuntur. Atque homines certe illi fuerunt facultate dicendi, & scribendi armati, qui cæco errore ducti, & gloriæ cupiditate decepti se ipsos nimium, & res externas amantes aciem Christi deseruerunt, ingrati, & miseri filii Sanctam Matrem Ecclesiam relinquentes, Diabolo se addixerunt: quem horribilem casum, & maximam multorum calamitatem deplorarunt multi docti homines elegantissimis libellis. Laudemus igitur iterum Dominum Deum Nostrum, qui te tanta calamitate liberavit, mentemque tuam ita illustravit splendore sui sancti luminis, ut non sedeas cum multis in tenebris, lumenque potius possis ostendere.

Ego

Ego certe is non eram , qui tibi , aut cuiquam præcepta traderem , præsertim cum doctorum hominum libri multi reperiantur , quibus copiose huiusmodi argumentum tractatum est . Sed tamen in re honesta , aut potius sancta voluntati tuæ obtempero ; Graciano etiam , viro præstanti ingenio , & admirabilissimis moribus , ut dixi , satisfacio ; tuum studium benemerendi de Ecclesia alo ; nihil aliud quæro . Omnibus hominibus , ut nemo fere ignorat , natura est insitum , ut aliquid agant , tantaque est rerum omnium auctoris , & principis Dei benignitas , & sapientia , ut in singulorum hominum ingeniis quædam semina indiderit , quæ si excolantur , mirabiles fructus afferunt rerum universitati . Sed proh dolor ! semina virtutum , & laudabilium artium multis in locis nemo curat excolere ; inde fit , ut quemadmodum incuria agricolæ in melioribus etiam agris nascuntur spinæ , ita culpa eorum , qui præsumunt , quamplurima ingenia corrumpantur ; cumque se ipsos homines cognoscere non didicerint , præcipientes ruunt in varias calamitates . Quapropter cum minime ad otium , nec ad inertiam , nec ad voluptatem præclarum animal hominem natum esse omnes facile possint animadvertere , applicatione ad aliquam rem vehementi ingenium alendum est , scientiarum , & artium studio vita omnium est occupanda , adolescentium in primis , quorum ætas in lubrico est posita , & veluti in mari procellis variis jactatur .

Non

Non vitupero studia aliquorum, qui ut de genere hominum benemereantur, & commodius vitam degant, arti medicæ, juris prudentiæ, atque etiam mercaturæ dant operam, sed multo magis sine dubio probanda sunt ea studia, quæ magis ad juvandam Christianam Remp. & ad gloriam Dei pertinent: inter quæ nullum magis Deo placet, nullum magis cum ejus gloria est conjunctum, & cum populi Christiani utilitate, quam id, quod ponitur in extirpandis hæresibus, quandoquidem illis nihil aliud homines moliuntur, quam minuere regnum Dei, augere tyrannidem Diaboli. Quod studium, quamvis sit proprium Episcoporum, quibus a Deo mandatum est, ut eradicent, & plantent, zizanias tollant, cum tamen ipsi tanto muneri satisfacere nequeant, studium illorum, qui in causa Christi, & ejus Sponsæ Sanctæ matris Ecclesiæ operam suam præstant, Deo est acceptissimum. Nam cum de hæresibus agitur, deque extirpandis, aut convertendis hæreticis, de Dei causa agitur, de ejus gloria, quam conculcari ille nunquam permittit; de salute populi Christiani, pro quo venit in mundum Filius Dei, pro quo sanguinem fudit idem Christus Jesus, agitur. Qua de re non sunt audiendæ voces illorum, qui dicunt: hoc pertinet ad Episcopum, atque etiam ad Parochum, ad me non pertinet: quid ad me, reperiantur multi hæretici, nec ne, modo ipse sim Catholicus? Pestis animorum est hæresis; cumque in peste duo sint mala, alre-

alterum quod prosternit, & in paucis horis ad interitum ducit corpora; alterum, quod valde perniciosum putatur, quod inficit: ita hæresis, ingenium, judicium, omnes virtutes, omnia bona, quibus anima prædita est, corrumpit, & animam ad interitum ducit, & servos Diaboli efficit, quodque valde deplorandum est, contaminat, & corrumpit multis rationibus populum Dei, concionibus, libellis, colloquiis, & multis aliis modis. Quare ad tollendum hunc morbum in quibusdam Reip. Christianæ partibus, ad succurrendum tantæ calamitati non unus sufficit medicus, Episcopi tantum munus implere, Inquisitores causam Dei tueri non possunt. Donet necesse est Dominus Spiritum scientiæ fidelibus servis suis, ut causam communem defendant, ægris mentibus, & labe infectis animis opem ferant.

Proinde tu, Nicolae, cum in Patriam tuam, in Regnum Poloniæ redieris, quod perturbatum esse varietate opinionum sæpe maximo cum dolore, & fere cum lacrymis commemorabas, versari debes in hoc, de quo ad te scribo, tollendarum hæresum studio, multo tamen diversa ratione, quam Episcopi, & Inquisitores apud nos facere consueverunt. Nam cum sanandorum morborum variz sint rationes, variaque a medicis adhiberi soleant medicamenta, quibus idem morbus sanetur; tibi tantum ipsa ætate, & in ipso vitæ genere licebit uti lenientibus medicamentis, hortationibus, precibus,

exemplis , præsertim ex nostris historiis sumptis , argumentis perspicuis , sine ostentatione , sine contentione , magna modestia , & humilitate Christiana . His enim rationibus impudentiæ suspicionem vitabis , & animos eorum quibuscum egeris , quosque Deo lucrari studueris , tibi conciliabis . Nihil , mihi crede , huic nobilissimo studio , cui te in primis deditum esse maximum Dei beneficium est , magis obest , quam opinio impudentiæ ; nihil magis impedit , quominus prolit quamplurimis , quam vel minima ostentatio , & inanis gloriæ cupiditas . Quamobrem enitere , ut quemadmodum tibi est propositum curare honorem Dei , & salutem illorum , quos a recta via deflexisse animadvertis , ita omnem vanitatis suspensionem adimas . Id autem consequeris , si eos , quibuscum agas , nunquam ad iracundiam provocaveris , si te nihil , aut perpauca scire profiteberis , si eos loquentes non impedieris . Qua in re cujusque præceptis non indiges ; ita enim a natura es formatus , ut illos etiam , quibus contradicis , in tui amorem trahas . Nosti , qui appellari debeat hæreticus , nempe is , qui postquam sacrum Baptismum suscepit , & fuit quantum sit satis in Catholica Fide instructus , pertinaciter errat contra id , quod scit ab Ecclesia Catholica pro fide teneri , sive oppositum veritatis asserens , sive de ipsa veritate dubitans : ex quâ descriptione colligitur , sine pertinacia quemquam appellari merito non posse hæreticum ; errare multos posse ,
quan-

quandoquidem naturæ nostræ id est proprium, hæreticum neminem esse posse, nisi qui ab Ecclesia recedens vel minimum in errore se pertinacem ostenderit. Quod cum ita sit, aptissimum erit fortasse hoc exordium cum illis, qui in aliquam hæresim inciderint: errasse quamplurimos, & errare quotidie doctos homines; lapsos etiã interdum, Deo permittente, ut imbecillitas humani generis rectius cognosceretur, Sanctos Viros, quos errores proprios fateri non puduit; fugiendam pertinaciam; errores deponendos. Ad quod argumentum tractandum fortasse hi loci erunt aptissimi: idem sentiendum; non sapiendum plus quàm oportet; non esse serviendum hominibus cum simus, memores libertatis, qua Christus nos donavit; homines fuisse omnes hæreticos, & ipsos quidem perverſis moribus perditos; non esse verisimile Christum proximis tantum annis effulsisse, & per tot sæcula tot millia hominum in tenebris reliquisse; Ecclesiam Sanctam Catholicam, Sponsam Christi, cujus Vicarius fuit Petrus, & fuerunt omnes, qui legitime ei successerunt, Martyrum sanguine stabilitam; esse perniciosum consilium ab ea discedere. Hanc pronunciaſſe Arcam Noe; extra quam quis salvus esse non poterit; hunc esse hæreticorum proprium morem, ut se invicem jugulent; diu in eadem sententia non persistant. Hæresis matrem esse cæcitatem mentis, comitem levitatem, & miseriam; esse magistrã seditionis, corruptricem

disciplinæ, adversariam obedientiæ, perturbatricem Regnorum, & Rerum publ. ministram Diaboli, discordiarum, & calamitatum omnium altricem; nulum Regnum, nullam Remp; quæ hac peste infecta fuerit, stetisse. Quos locos ubi tractaveris. multis argumentis, quæ tibi deesse non possunt, qui præclarum ingenium habes a natura, & in iis studiis plus profecisti, quam ætas tua pati videatur, in viam fortasse, Deo adjuvante, opera tua redibunt multi, fatebuntur se quidem errasse, nolle posthac errare, Catholicos se malle appellari, quam hæreticos. Si quis autem in errore persistat, quinque potissimum rationibus enitendum est illum in viam redigere, Auctoritate Sacræ Scripturæ, Conciliorum generalium, consensu Ecclesiæ, auctoritate Sanctæ Sedis Apostolicæ, & concordia Sanctorum Patrum.

Sed in ea disputatione, in qua adhibentur Sacræ Scripturæ, ad hæreticos convincendos da operam, ut sententias integras proferas, atque illas ab Ecclesia in eo sensu sumptas: quo loco commode posses tractare, non esse cujusvis interpretari Scripturas, quod, si omnes audeant arrogare sibi munus interpretandi, universam Theologiam confundi, & obscurari necesse sit. Si ullo unquam tempore modestia est necessaria, atque etiam fructuosa, est sane eo potissimum, cum de scripto contenditur; nam errare, labi, & decipi cuivis molestum est; molestissimum cum de rebus maximis, hoc est de Religione, agitur, & cum error præsentibus multis

con-

convincitur. Quamobrem ætati tuæ fortasse aptius erit, inter domesticos parietes disputare, & locis e Sacra Scriptura sumptis errores refellere; vulgatam editionem a communi populi Christiani magistra Ecclesia adhiberi, recitari etiam a Patribus non ignoras, cujus auctoritatem tueri omnes debemus. Quod si, ut plerumque videri solet, loci in Sacra Scriptura inter se pugnare videantur, multis argumentis uti poteris ad ostendendum, dubitationum, & controversiarum moderatricem esse Ecclesiam, a qua qui recedit, semper variis perturbatur erroribus. Magnum inest momentum in illa questione, non contineri omnia, quæ cognita sunt necessaria, & ad salutem etiam pertinent, Dei expresso verbo; sed multa traditionibus Apostolorum, quæ a Domino nostro Jesu Christo manarunt, Sanctæ Ecclesiæ filiis communicari. Quod si quædam subtrilia, & parum etiam fructuosa a Pythagora discipulis communicata sunt sine libris, ut majorem Pythagoricæ disciplinæ auctoritatem afferret; mirum non debet videri, cum scriptum sit in Evangelio, multo plura fecisse Dominum nostrum Jesum Christum, quam scripta sint, ita etiam multo plura dixisse, & dilectissimæ Sponsæ suæ, quam proprio sanguine redemerat, per fideles ejus ministros, per Sanctos Apostolos tradidisse; quemadmodum sunt sanctissimi ritus, qui adhibentur in Sacramentis, & multæ præclaræ sententiæ consensu sanctæ Ecclesiæ, & longo usu confir-

ma-

matæ. Dominum N. Jesum Christum literarum monumentis nil consignasse legimus, aut ut omnem vanitatis, & temeritatis suspensionem adimeret, aut quia facilius credituros homines cognovit, quæ alii suo Spiritu scripturi erant. Effundere ejus benignitatis divitias cum voluerit, minime est credibile, illis quæ scripta sunt, & quæ in Evangelio continentur, fuisse contentum, sed alia etiam diversa ratione communicare voluisse, ut charissimam Sponsam suam ornaret, & consolaretur. Quare si quis dicat, hoc in sacris libris non reperitur, ergo non est verum, has, quas attigi rationes, & alias quamplurimas adhibebis ad eos convincendos.

Magna est auctoritas Conciliorum, quia in Spiritu sancto sunt congregata, qui est magistrorum omnium doctor, & omnis veritatis interpret. Quamobrem si quis forte dubitet, non esse expressam in Sacra Scriptura Confessionem auricularem, aut non agnoscat tres esse partes Penitentiae, tu illi oppone locos e Sacra Scriptura, & Concilia; si quis de certitudine Gratiae disputer, tu decretum sancti Concilii Tridentini de Justificatione recita. Quatuor Conciliis generalibus tantam fidem adhibendam, quantam Evangelistis, nimirum quia idem est auctor Christus, scribit Sanctus Gregorius. Proximum Concilium, quod Tridenti maximo Dei beneficio, Pii IV. Pont. Max. diligentia confectum est, quod in primis observandum curat Pius V. quem Christi Vicarium, & Pastorem universalis

Ecclesiæ omnes agnoscimus, & veneramur, continet omnes fere salutare sententias, quibus hujus ætatis hæreses confutari facile possunt, atque etiam Ecclesiæ disciplina potest cognosci. Verum Sedis Apostolicæ auctoritas, hoc est Pontificis Romani decretum, satis est firmum argumentum ad tollendas hæreses. Nam Christi Vicarius Successor Petri errare non potest in iis, quæ ad sanctissimam Christi, cujus vicem gerit, Religionem pertinent, cum etiam sine consilio gravissimorum hominum Romani Pontifices quidquam decernere non consueverint. Verba illa, Rogavi pro te, Petre, ut non deficiat Fides tua, pertinent etiam ad successores; quod animadvertens beatissimus Leo, Specialis, inquit, cura Petri a Domino suscipitur, & pro fide Petri supplicatur, tanquam aliorum status certior sit futurus, si mens Principis victa non fuerit. Quamobrem tueri semper hanc sententiam, Christi Vicarium Pontificem Romanum errare non posse. Hinc tamen Reip. Romanæ orta calamitas, hinc tot schismata, tot hæreses, quod hominum erroribus Sedis Apostolicæ auctoritas comminuta est. Qua de re non est opus plura dicere. Judicia Dei abyssus, quæ silentio suscipienda, atque eo magis Dei benignitas prædicanda, quod interdum malis etiam Pastoribus, se ipsos potius, quam populos pascentibus, grex non perierit, & quod hoc præsertim tempore eum dederit Ecclesiæ suæ, ut modestissime dicam, Pastorem, qui unus nobis maxime hac tempe-

pe-

pestate fuisset exoptandus . Consensus Sanctorum Patrum maximam habet vim . Fieri enim non potest , ut si omnes errassent , eos Ecclesia tanto in honore tot annos habuisset . Sed oh dementiam intolerabilem ! Gregorius Nazianzenus , qui Theologus est dictus , Magnus Basilius , Vir admirabilis , Chrysostomus doctissimorum eloquentissimus , S. Ambrosius , magister Augustini , B. Augustinus , malleus hæreticorum , S. Hieronymus , doctrina & sanctitate insignis , S. Gregorius Pontifex , Sanctorum Pontificum exemplar , erraverunt , cum scripserunt , invocandos esse Sanctos , & amicos Dei , ut intercedant pro nobis ad Dominum ? Cum sequentes verissimam sententiam Jacobi , Fidem sine operibus esse mortuam , factores Legis Evangelicæ vitam æternam consecuturos tradiderunt , nos deceperunt sapientissimi homines ? Lutherus , & Calvinus , & fidelissimi eorum discipuli , & admiratores , post tot sæcula , soli sapiunt , soli possunt docere , soli Evangelici soli interpretes Scripturarum , & magistri veritatis habendi ? Antiquissimæ traditiones , de quibus discipuli Apostolorum Ignatius , Clemens , & vetustissimi Scriptores scripserunt , sunt fabulæ ? Purgatorium multis Scripturæ locis declaratum , rationibus confirmatum , & consensu totius Ecclesiæ receptum , figmentum putandum ? Quid moror ? impiis militibus , qui non fregerunt crura Christi , crudeliores , speciem pietatis præferentes , in multas partes scindunt corpus Christi , &

quan-

quantum in ipsis est, horribili quodam scelere illud interimentes, Ecclesiam Dei sua infidelitate, concordia, ac unitate privare nituntur. Charissime Frater (utor dulcissimo hoc nomine, quoniam te fraterno amore diligo, quoniam ejusdem Patris omnipotentis Dei filii sumus, ejusdem Christi, qui pro nobis, & pro omnibus sanguinem fudit, fratres, & eandem agnoscimus Matrem Sanctam Ecclesiam) hæc in animo impressa sint tuo, hæc sæpe inculca tuis Polonis. Unum Deum cum Patrem appellemus, ac principem, & moderatorem bonarum omnium rerum putemus; in unum Filium Dei Dominum nostrum Jesum Christum cum credamus; cum unum Evangelium a quatuor Evangelistis scriptum legamus, unum Psalterium recitemus, unum Amen respondeamus, unum Alleluja resonemus, unum Pascha celebremus, quid causæ est, cur non idem sentiamus? cur velimus sapere plus quam oportet? cur altiora nobis quæramus? Curiositate, ut inquit Tertullianus, non est opus post natum Jesum, nec inquisitione post Evangelium, cui tantum est credendum, quantum præscribit Ecclesia. Apostoli Domini nihil de suo arbitrio: nihil scire, omnia scire est: nervi sunt quidam, & artus sapientiæ, non temere credere.

Sed quoniam, ut maximum est amoris indicium non deferere peste infestos, sed illis præsto esse medicamentis, quia hujusmodi morbi non siæ medicorum periculo medicantur; ita etiam

C

ma-

maximum est charitatis argumentum, ubi cum hæreticis permittitur vivere, eos non fugere, eorum intolerabiles mores ferre, orationibus, hortationibus, disputationibus eniti, num ad veritatem Fidei redigi possint; in hoc enim studio sine aliquo periculo, & sine maxima molestia, ista præsertim, qua tu nunc es, ætate, versari nemo potest. Versaris tamen in nobilissimo studio, quod ut facias, donec fructuosum futurum laborem tuum prorsus non desperes, te etiam, atque etiam hortor. At quoniam in arte medica nihil est magis necessarium, quam morbos, & eorum causas cognoscere, omittam dicere quam gravis, & potius exitialis morbus sit hæresis; ejus causas potius explico, ut facilius remedia inveniri, ac etiam adhiberi possint. Causa hæresis est peccatum proprium, quare id usu evenire compertum est, ut qui multis vitiis sint inquinati in hæresim labantur. Malitia excæcat illos, ut scribit Salomon. Causæ autem proximæ sunt, superbia, avaritia, carnis illecebriæ. Hæc ideo commemorantur, ut adhibita illa regula, contraria contrariis curantur, si quos hæresi infestos agnoveris, ores clementissimum Patrem Deum, ut a peccatis liberentur, ab illis ipsi tanquam a veneno abstineant. Tunc facilis erit eorum curatio. Cum enim Spiritus Sanctus effugiat fictum, nec habitet in anima subdita peccatis, instruit libenter sinceram, & nulla peccatorum sorde inquinatam. Magna superbia est ambulare in magnis,

gnis, & mirabilibus super se, aliorum omnium iudicia, & sententias contemnere, proprio iudicio omnia tribuere. De huiusmodi hominibus scriptum est, obscuratum est insipiens cor eorum, dicentes enim se esse sapientes, stulti facti sunt: & Ezechiel Propheta in eadem sententia scripsit, Væ Prophetis insipientibus. B. Hieronymus hoc in loco hæreticos interpretatur, cum quibus nulla alia ratione tibi agendum est, & nullum aliud pharmacum, quoniam aciora adhibere fortasse non permittitur, exitiali morbo est adhibendum, quam illud, si sæpe humilitatem laudes, Christianarum omnium virtutum fundamentum; proponas in medium illam sententiam Salomonis, Ubi humilitatem, ibi sapientiam esse; & verba illa D. Gregorii, lumen veritatis, juxta sententiam Domini, elatis mentibus abscondi; non esse cur umbra, fumus, cinis superbit, & homo brevi vivens tempore, multis repletus miseriis, sensuum tyrannide oppressus, sibi tantum arroget, ut sibi magis, quam Ecclesiæ tot sæculorum iudiciis tribuendum existimet. Multum etiam proderit ad sanandum hunc morbum commemorare ex historiis calamitates, in quas inciderunt ii, qui proprio iudicio fratri, dulcissima matre, in qua majores sui enutriti sunt, relicta, relicta, inquam, Sponsa Christi, ad insanam illam, de qua initio huius opusculi scripsimus, mulierem transfugerunt; quorum præceptum consilium secuta est pænitentia, & miseria, ut apud Co-

clzum, & alios quamplurima exempla capere poteris, qui Lutheri, Zuinglii, Calvinii, & aliorum hæreticorum infelicissimos exitus monumentis historiarum commendarunt. Quod si ad deterrendos omnes, provinciarum etiam exempla in medium afferre volueris, infelix Græcia tibi argumentandi materiam præbere poterit, quæ cum Christi Vicarium agnoscere noluerit, & ab unitate Ecclesiæ discedere sit ausa, in miserabilem servitutem, quod a me sine lacrymis vix scribi potest, redacta est. Audisti etiam quid Cypri Insulæ, fortasse ob eandem causam, acciderit, quibus calamitatibus opulentissimum illud Regnum sit oppressum, de quo non est necesse scribere hoc loco. Sed, ut scis, de humilitate dicere, ut is, qui a superbiæ morbo sit sanandus, libenter audiat, ac medicamentum sibi accommodet, non facile potest is, qui non sit valde humilis. Quamobrem hac ipsa virtute, cujus multa indicia ostendisti, fac ut te exerceas, illam petas a Domino magnis precibus, de te ipso nunquam, aut raro loquaris, inanem gloriolam in disputationibus non aucuperis, importunas tui laudationes, tanquam dulcia venena, fugias, tibi ipsi minime blandiaris.

Scribit Justinus Philosophus, atque idem Martyr, qui sanguine Christi veram philosophiam confirmavit, Claudio Cæsare imperante Simonem Magum, cujus in Actis Apostolorum Lucas meminit, primum hæresis fuisse inventorem, quia furiosa qua-

quadam ambitione agitur pro Deo haberi voluit, & pro Deo, ut esset inferior, habitum, hunc titulum ejus imagini adscriptum, Simoni Deo sancto. Quo morbo cum laborasset post multos annos, ut Arium, & alios hæresiarcas omittam, Lutherus in Germania, & per totum orbem veluti numen coli sibi proposuerit, hominem Evangelicum missum ad ejiciendas tenebras errorum impudenter se esse professus est, qui a suo nomine Lutherani non appellarentur, eos hipocritas, pharisæos, impios, papistas, & execrabiles homines esse conabatur persuadere; tantumque ejus furor, ita permittente Deo propter peccata nostra, potuit, ut illapsus sit in Principum quorundam animos, & totam Germaniam, sed quid dico Germania? magnam Europæ partem superioribus annis minus ipse corruperit. Quod si quis consideret tantarum miseriarum causam, is inveniet non aliis rationibus has tragœdias concitatas, nisi quod Luthero Episcopatus a Romano Pontifice non fuit delatus; quod se, & ordinem suum vir elatus contemni in publicandis Indulgentiis iniquissimo animo tulit. Ambitio peperit Lutheranorum hæresim, eam aluit avaritia, quia dilapidatio bonorum Ecclesiasticorum est consecuta, & novis Evangelistis Diaboli, pædagogis, ac ministris, magna constituebantur stipendia. Eadem perniciosarum omnium rerum procreatrix, & altrix ambitio, inter Diaboli discipulos, Lutheri amicos, & admiratores, discordiam peperit, ita ut alii Zuingliani, alii Calviniani,

ni, alio nomine alii appellentur. Non legimus a Petro petronianos, a Jacobo jacobinos, nec a Paulo paulianos, sed auditores, & Apostolorum discipulos communi nomine appellatos esse servos Christi, quia ejus gloriam propositam habuerunt: immo a D. Apostolo acriter reprehensos legimus quorundam sermones, qui dicebant, ego sum Capha, ego Pauli, cum inquit, nunquam divisus est Christus. Hoc igitur præcipuum sit pharmacum, quod hæreticis, quorum hæresim ambitionem peperisse noveris, est adhibendum, ut eis sæpe ponas ante oculos, quam misera sit ambitio, quam detestanda, ac fugienda sit superbia.

Ab alia causa idem perniciosus morbus profiscitur, cui diversum adhibendum est medicamentum, nam quamplurimos avaritia hæreticos fecit, quod innuit Apostolus in Epistola ad Timotheum, cum ait, qui volunt divites fieri incidunt in tentationem, & in laqueum diaboli, & desideria multa, & nociva, quæ mergunt hominem in interitum, & perditionem; radix enim omnium malorum cupiditas, quam quidam expetentes erraverunt a Fide, & inseruerunt se doloribus multis, scilicet, quia divitiis Ecclesiæ studuerunt; quia patrimonium pauperum non recte ab Episcopis administrari judicaverunt; quia agros Ecclesiæ suis patrimoniis augendis ob vicinitatem commodos intellexerunt; quia persuadentes bona Christi, & pauperum esse bona Regum & Principum, ea ratione in animos

eorum illabi posse speraverunt, ideo dilapidata est hæreditas Christi, patrimonium pauperum consumptum est, decimæ denegari cæperunt quibusdam Episcopis, piaculum existimaverunt clericis non aliquid semper demere. D. Gregorius refert, radix juniperorum cibus eorum ad hæreticorum avaritiam, ex qua peccatorum omnium spinæ produxerunt. Si ista causa laborantes aliquos cognoveris, qua Ecclesiæ adimuntur bona, adempta clero ostende sublata pauperibus, Deo relinquendum iudicium contra malos eorum administratores; si quid clero, aut religiosis viris adimatur, id corrumpere patrimonia, illud calamitatem parere tantam injuriam auctori omnium bonorum inferentibus; divites & injustos egere, nihil deesse timentibus Deum; occupationem bonorum Ecclesiæ esse nuntiam servitutis, & omnium miseriarum, quod provinciarum multarum calamitatibus facile tibi erit ostendere. Multas hæreses ab avaritia non solum profectas, sed enutritas esse, & nunc etiam nutriri, prudentes Viri ita sibi persuadent, ut putent multos hæresiarcas stipendiorum causa, quæ infeliciter ipsis nihil aliud quam perniciem animarum molientibus, publice in Civitatibus decreta sunt, in errore persistere, quæ nisi se amissuros metuerent, resipiscerent, & errores faterentur suos. Nosti locos: nihil esse tam angusti animi, quam amare divitias; brevem esse hanc vitam; illos thesauros querendos, qui subripi nulla ratione possunt;

uni-

unicuique studendum esse bene vivere, & sibi adiutum facere fide, & sanctis operibus ad beatam, & æternam vitam.

Hæresum multarum, & variarum calamitatum origo, & causa est perniciofa illa naturæ lena, & pessima consiliaria voluptas, de qua in libro Sapientiæ scriptum est: inconstantia concupiscentiæ transvertit sensum sine malitia; ex quo accidit, ut multi in hæresim lapsi sint, putantes voluptates esse licitas, fornicationem non esse peccatum; aut se non posse voluptatibus resistere. Quam morbi perniciosissimam causam animadvertens Paulus ita scripsit ad Romanos: Rogo autem vos, fratres, ut observetis eos, qui dissensiones, & offendicula propter doctrinam, quam vos didicistis, faciunt, & declinate ab illis, qui Christo Domino non serviunt, sed suo ventri. Quem locum interpretans Theophilactus, ex ventris ingluvie, & vitiorum servitute ortas esse omnes hæreses scribit. Et profecto illa hæresis, quæ docet, nullum, aut servum esse liberum arbitrium, peccatorum auctorem Deum facit, horribile illud Stoicorum fatum confirmat, leges, & omnem vitæ ordinem perturbat, inde ortum habet, quod multum delectat indulgere genio, voluptatibus disfluere, & sperare vitam æternam; inde, quia natura est insutum, ut quæ facere non pudet, fateri maxime pudeat, stultam, aut supervacaneam Confessionem, minime necessarias alias partes pœnitentiæ contritionem, & satisfactionem, dictitant. Quæ portenta opi-

opinionum sequuntur alia; non esse orandum pro mortuis, quippe qui non egeant auxilio nostro; nullas esse Indulgentias; nullam, aut minimam Vicarii Christi auctoritatem: hinc illa verba, sola Fides justificat, opera nihil profunt, immo obfunt ad vitam æternam; neminem esse justum inhærente justitia, sed eum tantum, cui non imputavit Dominus peccatum. Ad quam gravissimi, & lethalis morbi causam tollendam, dilecte Deo, & hominibus, tua opus est industria, tua fide, tua charitate, tuo judicio, crebris tuis orationibus, ut det tibi Dominus Spiritum scientiæ, ut possis etiam seniores docere, ægris animis vim morbi ante oculos ponere. Ut autem in hoc salutari argumento verferis, erit admodum utile, ut sæpe naturam hominis explices; ad quid natum sit præclarissimum animal aperias; qua ratione post lapsum primi parentis, a quo omnes originem traximus, liberum hominis arbitrium admodum debilitatum, Dei benignitate, Christi sanguine pretioso, sit magna ex parte recuperatum; quæ nobis jucundiora sunt, magis suspecta, ut D. scribit Basilius, esse habenda; difficiliora, esse pulchriora, & optabiliora; quæ generi hominum magis conducunt, ea divinitus tradita, & veritati esse magis consentanea; Apostolos Christi, Martyres, sanctos Doctores, cruciatibus, laboribus, & vigiliis ad beatam vitam pervenisse; non esse abutendum divina clementia; eundem Deum esse misericordem, & justum; prodesse magis humano ge-

D

ne-

neri, ut tribuatur unicuique secundum opera sua, quam inanem fiduciam, & temerariam æternæ vitæ securitatem prædicare; ideo credendum esse Sacræ Scripturæ, consensui Ecclesiæ, Sacris Conciliis, & sanctis Traditionibus, bona opera esse necessaria ad salutem; non esse satis dicere, peccavi; agendam pœnitentiam; Indulgentias, quæ cum in Jesu Christi D. N. meritis fundatæ sint, ex thesauro Ecclesiæ, & sanctorum meritis a Vicariis Christi fidelibus conceduntur, esse magnificiendas; salubre esse orare pro mortuis, quandoquidem etsi culpa, cui ob peccata obnoxii erant, Dei misericordia condonata sit, pœnæ ut satisfiat divina justitia exigit.

Dogmata Ecclesiæ, & confutationes hæresum non est necesse commemorare, quum extent quamplurimi libri doctorum, & piorum hominum, qui eas complexi sunt, atque in ordinem redegerunt; quos libros aut tu legisti, aut certe leges. Scripsit D. Augustinus de hæresibus; scripsit eodem tempore, ante Augustinum fortasse, Epiphanius Episcopus Salaminæ Cypri, quæ urbs nunc a Turcarum tyranno magno conatu, magnisque viribus oppugnatur, ingens volumen, quod Pancratio inscripsit, quod postea Theodoretus Episcopus in compendium redegit, & in quatuor libellis digessit, quos *αἱρετικῆς κακομαθίας* placuit inscribi; quasdam confutavit Divus Hieronymus, aliquas ante ipsos S. Irenæus, quasdam Vincentius Lirinensis, qui aureolum decies legendum scripsit libellum. Sed omnes comple-

plexus est Alphonfus de Castro, qui certe in illo opere non minimam laudem est consecutus. Extant etiam quædam tabulæ, quibus compendiarie quadam ratione omnes hæreses, quæ ad hanc usque ætatem fuerunt, descriptæ sunt, & ante oculos positæ, atque etiam rationes breviter, & dilucide explicatæ, quibus possint confutari. De Ecclesia multi etiam scripserunt in hanc sententiam, Cardinalis de Turre cremata, Albertus Pighius, & alii quamplurimi; sed fortasse ex Rossense, qui Lutheri hæresim confutavit, atque etiam ex pulcherrimis Cardinalis Ofii libris, multa capere poteris argumenta ad præclarum tuum studium alendum. Pulcherrimus sane est ille libellus, de expressio Dei verbo, ac in manibus semper habendus, quo Apostolorum traditiones comprobatur, & Sedis Apostolicæ auctoritatem ita confirmat, ut fundamenta hæreticorum magna ex parte ab eo videantur evelli. In illo magno opere, quod est inscriptum, Confessio Fidei Catholicæ, horum temporum hæreses confutatæ sunt, Lutherum, Calvinum, Zuinglium, Anabaptistas, & hujusmodi portenta hominum, veritatis gladio videtur Vir doctissimus ejus auctor jugulasse. Quoniam domesticis exemplis magis movemur, tu Polonus Poloni Cardinalis, quem omnes nationes, & nos in primis Itali admiramur, libros diligenter lege; redige quæ scripsit in capita argumenta ad usum rerum; locos pulcherrimos, quos affert ex historia Ecclesiastica, & ex S.S. Patribus,

commenda memoriæ. Sed in primis cupio, ut elegantissimam illam parænesim, quam in calce operis scripsit, tu, & omnes Poloni sæpissime legatis. Recordemini fidem, pietatem, constantiam priscorum Polonorum; recordemini Albertum, & Stanislaum, quos ille Apostolos Poloniæ nominat; ab eorum pietate non degeneretis.

Verum cum hæresum præcipuas causas explicaverim, atque etiam tibi fortasse notas, & qua ratione essent adhibenda remedia, quoniam restant adhuc aliquæ perniciosissimi hujus morbi causæ, eas commemorabo. Mali concionatores hæresim pariunt, nutriunt, atque etiam augent. Hi discipuli Diaboli nihil aliud student, quam seditiones ciere contra sanctam Matrem Ecclesiam, atque interdum contra Principes; modo ipsi magistri appellantur, & magnis stipendiis eorum impudentia & temeritas alatur, nihil aliud curant. Dabis tu operam, quantum in te erit, si aliqua hujusmodi calamitas illi Regno acciderit, si aliquod hujusmodi monstrum fidelem populum apud vos perturbare aggredietur, ut ejus, quos amas, a consuetudine avertas, arceasque quantum possis; roges ut angelum Sathanæ non audiant, ne se ipsi tanto periculo subiiciant; multo diligentius roges illos, qui gratia, & auctoritate possunt, ut hujusmodi monstra omnia, eorum opera expellantur. Et quoniam, ut scis, Fides est ex auditu, & illi qui Legatione funguntur, auditi cum fructu non possunt, nisi mittantur, hoc tibi maxime

cst

est enitendum, ut catholicos concionatores, Dei gloriam non suam quærentes, ames, laudes, honoribus afficias, eorum consuetudine, & familiaritate utaris, ad illos ducas eos, quos gravissimo morbo liberandos tibi proposuisti. Atque, ut ego arbitror, erit admodum utile interdum conferre sententias, & mores illius, quem sequeris catholici concionatoris, cum hæreticis, quandoquidem cum hæresi sæpe soleat esse conjuncta superbia, plerumque avaritia, & inconstantia, quæ vitia longe solent abesse ab iis, qui in Ecclesiastica disciplina versati, sancta aliqua regula se astrinxerunt. Hoc loco homo Italus de Polonis Episcopis, deque illius Regni administratione, non agam: si nullus hæreticus concionator auditur, si optimorum Episcoporum diligentia, verbum Dei explicantibus, & Legatione pro Christo fungentibus non eger istud Regnum, vehementer laudo, tuque multo facilius hæc ipsa, quæ scribo, & multo plura præstabis.

Jam pervenit Oratio ad eum finem, ad quem spectabat, ut ad usum tuum omnia revocarentur, quæ collegi, præcepta. Parentes tui, quibus instrumenti usus est Dominus ut esses, quibus omnia officia debes, non idem fortasse nobiscum sentiunt, non levi fortasse morbo laborant, maximum imminet periculum ipsis, & tibi. Quid igitur facies? Luge primum, deinde ora, tertio obsecra, extremo doce. Luge, Fili Dei, frater Christi, sanctam Matrem Ecclesiam agnoscens, eorum casum, qui aciem
Im-

Imperatoris nostri turpissime deferuerunt, & ab impiis hominibus seducti appellare non possunt amplius Deum Patrem, nec Fratrem Christum, cum Ecclesiam communem Matrem reliquerint. Luge adhuc magis, si eos, quibus omnia debes, in tantam calamitatem incidisse animadvertis. Hic luctus Christiano homine dignus, qui non tam profusione lacrymarum, quam interiori animi dolore definiendus est, non potest non esse fructuosus; nam præterquam quod est bonus magister, qui te docere poterit infirmitates, & calamitates hominum, quod maxime confert ad omnem superbiam vitandam, solet esse condimentum orationis, & plerumque magnam vim habuit apud clementissimum Patrem Deum. Ut enim alia exempla omit- tam, cum Monica, sanctissimæ sceminæ, lacrymæ ita fuerint acceptæ illi omnis sanctitatis largitori Deo, ut ejus filius B. Augustinus diu Manichæus esse non potuerit, quis desperet lacrymarum tuarum parentes misericordiam, & gratiam a Deo impetraturos? Beatos dixit Dominus lugentes. Cum beatos dixit, dixit sapientes, dixit agnoscences se ipsos, & pericula, quibus expositi omnes sumus, dum vivimus. Sed hæc est adhibenda cautio, ne lugeas ut dolore tabescas, ut crucieris, ut oblitus maximorum, quæ accepisti, beneficiorum non agas gratias Deo; lugeas potius ut ores, ut oratio tua Deo sit accepta. Ora, ut ii, qui te genuerunt, eum qui omnes creavit, tue- tur, amat, & cælestem præparavit hæreditatem, agno-

agnoscant; domus tua sit domus Dei, & Catholica Fidei, ecclesiasticarumque sanctionum alitrix, & magistra; in ea idem sentiant omnes; unum fateantur Deum, unum Baptisma, unam sanctam Matrem Ecclesiam; perverſæ opiniones ex animis omnium eradicentur. A gratiarum actione exordiendas orationes sanctissimi Viri monumentis literarum tradiderunt, quod tu maxime omnium facere debes, qui adolescens adhuc variis, & maximis beneficiis a Deo es affectus. Quod autem in Oratione hac maxime requiratur, ut ea petantur, quæ pertinent ad sanctificandum nomen Domini, nulla ratione magis Dei gloriam conservari, quam si in Fide Catholica omnes stabiles, & firmi maneant, & si quis deflexit redeat in viam, nemo non videt.

Itaque ad illum, fidei, spei, charitatis, & bonarum omnium rerum, ac cogitationum auctorem Deum, animum intendas tuum, eumque iis verbis, quod fortasse facis, ora: *Non peto honores, non enim me latet quantam sollicitudinem conjunctam habeant; neque etiam humanarum rerum scientiam vehementer querendam arbitror, cum sapientem legerim qui scripsit, qui addit scientiam, addit & dolorem. Nihil aliud peto, nisi ut ii, quibus omnia debeo, quibus organis usus es, ut ego ad te colendum, & amandum, & ad gloriam suam omnibus studiis querendam, in banc lucem venissem, vere illi primum Te agnoscant. Noli pro tua benignitate, me diutius tanto, & tam magno dolore cruciari. Da, ut ejusdem Filii*
tui

tui dilectissimi Sponsæ, & Sanctæ Matris Ecclesiæ, cujus me filium esse profiteor, filii sint parentes mei. Senes adolescentem audiant, immo Sanctum Spiritum tuum in adolescente loquentem non rejiciant. Petite, dixit dilectissimus Filius tuus, & accipietis. Ecce peto, & magnis precibus peto rem ad honorem, & gloriam tuam maxime spectantem. Concede, benignissime Pater, quod peto; voces meæ exaudiantur; lacrymæ meæ prosint illis, qui tot incommoda, & tot labores in me educando pertulerunt; respondeant illis lacrymis, quas ipsi, dum aliquo incommodo afficerer, pro me profuderunt. In hujusmodi orationibus si aliquandiu versaberis, dabit tibi fortasse Deus spiritum consilii, dabit facultatem dicendi, ita ut persuadeas, ut gravissimo errore parentum animos liberes. Benignus est Dominus, exaudit supplicum preces. Ubi autem oraveris, obsecra. Difficile est, juvenem magistrum agere, atque eos, a quibus erudiri oportet, erudite, difficile, atque etiam periculolum; sed difficile amanti Deum nihil est; cui a Spiritu Sancto sit edoctus, nihil potest esse periculolum, aut molestum. Obsecra parentes, eo potissimum tempore, quo ipsi tuis sermonibus, & tuo aspectu recreari videntur, ne diutius errent, & ambulent in tenebris. Obsecra, per illum ipsum, quem omnes Patrem appellamus; per Unigenitum ejus Filium D.N. Jesum Christum, qui ad depellendas omnium errorum tenebras verus Magister, ad sanandos orbis terræ morbos verus Medicus venit in mundum;

pet

per Sanctum Spiritum, optimum veritatis interpretem, & in nostris calamitatibus verum consolatorem. Obsecra per amorem, quo te diligunt, maximum, per labores, quos pertulerunt pro te, per salutem animarum suarum, per existimationem familiæ tuæ, ut unam credant Sanctam Ecclesiam Catholicam, columnam, & firmamentum veritatis; te in omni vita fore miserrimum, nisi ipsi redierint in gremium dulcissimæ Matris; generis nobilitatem, divitias, affinitates te non magnificare, si Catholicæ Fidei hæredem te non reliquerint. Obsecra, increpa cum omni patientia, cum omni humilitate, atque etiam interdum cum lacrymis; cumque sua cuique placeant, & nihil videatur esse tam parentum, quam filii, usuque evenire soleat, ut aspectu filiorum, sermonibus, vitiis etiam interdum, parentes delectentur, aude; magistri adolefcens personam indue.

Quid doceam, inquires, hac ætate, cum ipse maxime doctore egeam? Doce, id tenendum esse, quod ubique, quod semper, quod ab omnibus creditum est; universitatem, antiquitatem, & consensionem sententiarum quærendam; vetustatis castissimos limites non esse prætereundos; bene fundatam antiquitatem scelecta novitate non esse subruendam; præphanam hæreticæ curiositatis libidinem fugiendam, retinendam antiquitatem, explodendam novitatem; illum esse verum, & germanum catholicum, ut Vincentius Lirinensis scripsit, qui

E

Ec

Ecclesiam, qui Christi Corpus diligit, qui divina Religioni, qui Catholicæ Fidei nihil præponit, non hominis cujuscumque auctoritatem, non amorem, non ingenium, non eloquentiam, non philosophiam, sed cuncta despiciens, & in fide fixus, & stabilis permanens, quidquid universaliter antiquitus Ecclesiam tenuisse cognoverit, id solum tenendum, credendumque decernit; quidquid vero deinceps ab aliquo præter omnes, vel contra omnes Sanctos, novum & inauditum subinduci senserit, id non ad Religionem, sed ad tentationem potius, senserit pertinere: hoc nomen Catholicum esse nobilissimum, hoc ad veram, & solidam laudem maxime pertinere; non solum Timotheo a B. Paulo dicta esse illa verba: depositum custodi, devita prophanas vocum novitates, & oppositiones falsi nominis scientiæ, sed dicta esse omnibus Episcopis, populo christiano universo. Deposuit universitas, deposuit veritas, deposuit consensus Sanctæ Matris Ecclesiæ verissimas sententias; custodiendæ sunt; cavendum est, ne diversitate opinionum, novitate, & dissensione depositum amittatur, & perturbationes oriantur. Vitandæ sunt prophanæ vocum novitates, sola Fides justificat, liberum arbitrium non est liberum, sed servum, & hujusmodi opinionum portenta (sæpe utor his nominibus, quia magis propria non invenio). Vis paucis dicam? Doce, unam esse sanctam Ecclesiam Catholicam; unam, quia ubi non est unitas, non potest esse perfectio, quia ut una do-

domus ab uno patrefamilias, unus exercitus ab uno Imperatore, unum regnum ab uno Rege administratur, ita unam Ecclesiam ab uno Christi Vicario regi, & administrari decet; Sanctam, quia Christi sanguine firmata, & stabilita est; Catholicam, quia per totum orbem diffusa est. Hæc magistra, hæc arbitra docuit, docet, & docebit omnia. Hæc B. Cyprianum doctorem, & martyrem; hæc Gregorium Nazianzenum, Basilium, Chrysostomum, B. Ambrosium, S. Augustinum, Hieronymum, & Gregorium Pontificem; hæc Hilarium, Theodoretum, & quamplurimos alios sanctos doctores erudit; hæc Concilia absolvit; hæc D. Thomam doctissimorum hominum sanctissimum; hæc Bonaventuram, virum doctrina, & pietate insignem, & alios eximios doctores, qui, Aristotelica arte adhibita, res sacras docuerunt, docuit; hæc alit multis jam sæculis salutari cibo innumerabiles Dei servos. Doce, ab hac Ecclesia Catholica Romana nunquam recedendum, insanorum hominum voces minime audiendas, quibus tacite clamant ac si dicerent: *Venite, o insipientes & miseri, qui vulgo Catholici vocamini, & discite fidem veram, quam præter nos nullus intelligit, nuper vero revelata, & ostensa est; sed discite furtim, atque secreto, delectabit enim vos.* Quibus verbis, quem nominavi, Vincentius, descripsisse videtur Lutherum, Calvinum, Melancthonem, & hujusmodi homines sibi nimium placentes. Hæc est summa, hoc est compendium bonarum om-

nium sententiarum , ut credamus unam sanctam Catholicam Ecclesiam . Si quis in hac verissima sententia consentiat, errare quidem interdum is poterit, hæreticus nunquam esse poterit.

Verum , postquam fleveris , oraveris , obsecraveris , ac demum ubi doctoris etiam partes egeris , si lacrymas tuas , si orationes tuas nihil prodesset , si obsecrationes , atque etiam doctrinam nullum fructum afferre ad perniciosum morbum tollendum animadverteris , fuge , frater , attende tibi , consule salutem tuam . Vera fuga , non clericorum solum , ut B. scribit Ambrosius , sed omnium , qui ad vitam aspirant beatam , est abdicatio domesticorum , & quædam alienatio charissimorum , ut suis se abneget qui servire Deo gestit . Fuge periculum , ne incidas in illud . Transi , sicut Deo dilectus David , qui transivit , ut recumberet ; transi sicut Moyses , ut tandem videas Deum Abraham , Isaac , & Jacob , & videas visionem magnam . Sed si videre vis , solve calciamentum pedum tuorum , solve vinculum iniquitatis , solve omnia vincula sæculi , amorem patriæ , blanditias parentum , affines , dulces amicos , divitiæ , honores , & quidquid insanus admiratur mundus . Transi , & veni , immo redi , frater , in Italiam , in illam , quam tantopere diligis , quam sæpe laudas provinciam ; in urbem Romam , sedem Ecclesiæ , quæ est columna , ut dixi , & firmamentum veritatis , veluti in portum te recipe . Si omnes deseruerunt te , Dominus assumpsit te , ut dice-

re

re consuevisti. Multa te ad videndam urbem Romam hoc potissimum tempore possunt impellere, & quod est Mater, & altrix incontaminatæ Religionis, & quod in ea hoc Pontifice Pio V. Ecclesiastica disciplina in pristinum candorem videtur restituta. Nutrix ingeniorum, magistra judicii, ineptiarum expultrix, honorum, & dignitatum dispensatrix, & omnium gentium Mater urbs Roma appellari consuevit. Hanc ubi videris, te amabit, te suscipiet ut filium. Neminem, in quo vestigium veræ virtutis apparet, non fovet, non amplexatur benignissima Mater. Alia etiam te juvenem ad res præclarissimas natum, & nobilissimis studiis deditum maxime debent invitare ad urbem Romam cogitandam; quod in ea reperiantur in omnium scientiarum, & virtutum genere præstantes viri, quos non commemoro, quoniam nec meo, nec ullius testimonio illorum virtus indiget. Præterire certe non possum Gulielmum Cardinalem Sirletum, Virum pietate, humanitate, & multiplici doctrina præstantem, quem nemo adit (aditus autem ad eum patet omnibus) quin doctior, atque etiam melior recedat. Hunc de variis rebus loquentem audiens, novum quemdam Hieronymum te audire judicabis, nihil enim non legit, nihil non habet in promptu, nihil non affert in medium, quod ad humanarum, divinarumque rerum cognitionem pertineat. Quod si discendæ inanis philosophiæ causa multi apud veteres longa itinera susceperunt, quod iter

iter tam longum suscipi jure non debet a minime occupatis hominibus , ut cum eo Viro loquantur ? Mihi certe nihil potest esse jucundius memoria illius temporis , quo humanissimis , & doctissimisejus sermonibus licuit interesse ; ita ut me Syrletum , tunc minime Cardinalem , sæpe allocutum magnum Dei beneficium existimem . Collegium Cardinalium , atque etiam urbem Romam illustrat Cardinalis Clarevallensis , cujus admirabilem doctrinam , & vitæ sanctitatem optimi , & doctissimi Viri admiran-
 tur ; cum illo viro veluti cum successore dignissimo , & legitimo B. Bernardi Abbatis , licebit habere sermonem . Stanislaum vero Cardinalem Varmiensem , lumen Poloniæ , lumen etiam Ecclesiæ , lumen urbis Romæ , non sine magna voluptate intrueri poteris , & domestico exemplo commotus , certo scio , ad veram Religionem retinendam , & ad omnes labores pro Sancta Ecclesia perferendos excitaberis . Quid de Cardinale Commendono dicam , Viro præstantissimo ingenio , & multiplici rerum usu , qui te paterno amore diligit , qui magnam de te , hoc est de tua constantia , & studio erga sanctam Matrem Ecclesiam , opinionem concitavit , & cum incidit sermo , concirat ? Hunc cum vides , non est cur paternum officium desiderare possis . Ejus domus tibi patet , & semper patebit , ut paterna ; rebus suis ita uti potes , ut patris , cum de te , hoc est de anima tua , de studio ergo Catholicam Fidem Vir Religionis amantissimus sit maxime sollicitus .

Abun-

Abundat urbs Roma bonis institutis & legibus, abundat copia sanctorum hominum, frequentia sanctissimorum Sacramentorum se ipsos in hujus vitæ peregrinatione sustentantium, quorum mores cum ad Angelicam naturam videantur accedere, profunt plurimum illis, qui Romæ vivunt. Cujusmodi autem sint homines, qui Romæ hoc Pio V. Pontifice habitant, Pater Franciscus Toletanus, vir doctissimus, & innocentissimus tibi indicare poterit.

Verum si urbem Romam ingenio, & studiis tuis minime aptam existimas hoc tempore, & ista tua ætate, Patavium iterum cogita. Redi in illam Civitatem, in qua te nemo non diligit, in qua, cum aliquot annos vixeris, omnibus discedens tui desiderium, & jucundissimam virtutum tuarum memoriam reliquisti. Favebit ingenio, & studiis tuis, & multa erga te benevolentia testimonia dabit optimus illius Civitatis Episcopus; cui Civitati bonarum artium, & disciplinarum altrici, cum scias propinquam esse Veronam, uti poteris interdum hoc cælo, minime sane infelici, & meorum etiam Veronensium consuetudine, quibus certe, ut modestissime dicam, non deest ingenium, non deest doctrina, & multarum rerum cognitio. Loci amœnitatem, ut scis, non desiderabis; quo in loco sanctissimus Vir, qui deinde fuit Pontifex Paulus III. aliquot annos habitavit. Poteris & tu cum libris, quandiu volueris, degere. Sed antequam fugias,

ut

ut dixi, luge, ora, obsecra, doce; & si tibi omnino fugiendum est (qua in re adhibe consultorem te ipsum, hoc est conscientiam tuam, & amplissimum Cardinalem Commendonum, nunc apud vos Sanctæ Sedis Apostolicæ Legatum) fuga tua incipiat a lacrymis, ut ejus exitus sit gaudium; & fugiens spera futurum fortasse, ut rediturus sis in patriam, magno cum gaudio, & cum salute illorum, quorum salus tibi in primis est curæ. Potens est enim Dominus, & omnia, quæcunque voluit, fecit, & plerumque differt bona, quæ petimus, concedere, ut ex dilatione majora oriantur commoda, atque inde ipsius gloria major appareat.

F I N I S.

